

DITAME SOBRE OS PROXECTOS DE MODIFICACIÓNS DE ORDENANZAS FISCAIS PARA 2026

Polo Servizo de Facenda Local trámítanse os expedientes para a modificación de determinadas Ordenanzas fiscais, polo que, antes da súa remisión ao órgano competente para a súa aprobación interésase deste Tribunal Económico-Administrativo do Concello de Lugo, o preceptivo ditame a que se refire o artigo 137.1 apartado b) da Lei 7/1985, do 2 de abril, na súa redacción dada pola Lei 57/2003, do 16 de decembro, de medidas para a Modernización do Goberno Local.

Este Tribunal Económico-Administrativo, ao abeiro do establecido no artigo 4º.b) do seu Regulamento Orgánico, ten atribuída, entre outras funcións, a de emitir un ditame dos proxectos de modificación das Ordenanzas fiscais.

En cumprimento da normativa anteriormente mencionada, e á vista dos citados expedientes, no que constan as modificacións que se propoñen, reúnese o Pleno do Tribunal Económico-Administrativo do Concello de Lugo, integrado polo vogal, Pedro Fernández Agustí, maila suplente María Jesús López Vázquez (por ausencia tralo cesamento do Presidente e a Secretaria do Tribunal), acordando por unanimidade dos membros presentes a aprobación do seguinte:

D I T A M E

I. ANTECEDENTES

Con data 10 de setembro de 2025 remitíronse a este Tribunal Económico-Administrativo os expedientes coa documentación correspondente á modificación de determinadas Ordenanzas fiscais, ao obxecto da emisión do ditame preceptivo.

Dende o punto de vista formal cabe salientar que os expedientes de modificacións de cada Ordenanza Fiscal inclúen os informes dos diferentes servizos afectados ou interesados na aplicación da Ordenanza modificada, un informe xeral da xefa de servizo de Facenda Local que recolle todas as modificacións propostas co conforme da Asesoría Xurídica, así como os proxectos de modificación de cada Ordenanza asinados pola tenente de alcalde delegada da Área de Cohesión Territorial, en suplencia do tenente de alcalde delegado da Área de Xestión Integral de Recursos Internos, Urbanismo e Deportes e Xuventude do Excmo. Concello de Lugo.

Para a iniciación destes expedientes consta Decreto número 7876/2025 do 12 de agosto de 2025 asinado pola tenente de alcalde delegada da Área de Cohesión Territorial, en suplencia do tenente de alcalde delegado da Área de Xestión Integral

TRIBUNAL ECONÓMICO-ADMINISTRATIVO

PFA

Refª: Dictame modificación Ordenanzas fiscais 2026

Asunto: Ditame modificacións Ordenanzas fiscais para 2026

de Recursos Internos, Urbanismo e Deportes e Xuventude do Excmo. Concello de Lugo, que insta a incoación de expediente de modificación e actualización de determinadas Ordenanzas fiscais vixentes.

II. CONTIDO

Con carácter previo, debe sinalarse que este ditame límtase unicamente á valoración dos aspectos estritamente xurídicos das propostas de modificación das Ordenanzas fiscais que se nos presentan, polo que quedan fóra da nosa análise tanto as cuestións de política fiscal que estas puidesen suscitar como as de carácter procedimental, en canto aos trámites de aprobación dos ditos proxectos normativos.

As modificacións previstas nas Ordenanzas fiscais presentadas comprenden **modificacións técnicas** na Ordenanza Fiscal Xeral que fan referencia a cambios na redacción, adaptacións á nova normativa ou reestruturación de apartados do articulado que optimizan a xestión dos servizos municipais que regula a ordenanza en cuestión e que, polo xeral, non teñen impacto económico directo.

Destaca tamén a modificación da Ordenanza fiscal núm. 200 no que atinxe á bonificación para vehículos históricos e á exención para os tractores, remolques, semirremolques e maquinaria provistos de Cartilla de Inspección Agrícola, así como a modificación da Ordenanza fiscal núm. 203, reguladora do imposto sobre bens inmobles, no referente á posibilidade da división da cota tributaria a petición dos interesados no suposto de concorrencia de varios obrigados tributarios e a exención para aqueles inmobles de natureza urbana nos que a súa cota líquida, antes da posible división antes referida, sexa inferior a 3,90 €.

A continuación realízase unha descrición e análise individualizado das modificacións que se propoñen das respectivas Ordenanzas fiscais:

1. No proxecto de modificación da **Ordenanza fiscal xeral** recóllense as modificacións propostas pola Tesoureira Municipal e pola xefa do Servizo de Facenda Local que abranguen unha serie de cambios de redacción e adaptacións do articulado á normativa que optimizan a xestión do servizo de tesourería municipal na aplicación desta ordenanza (fundamentalmente referentes aos prazos de pagamento, división da cota tributaria, aprazamentos e fraccionamentos así como á aprobación dos padróns).

Proponse a modificación do artigo 33.4 onde se regula a posibilidade da división da cota tributaria a petición dos interesados, no suposto de concorrencia de varios obrigados tributarios, en concordancia ao previsto no artigo 35.7 da Lei 58/2003, do 17 de decembro, Xeral Tributaria, suprimíndose a restrición de non posibilidade

desta división naqueles supostos que como consecuencia da devandita división resulten cotas líquidas de importe inferior a 6,00 €.

Redáctanse de novo os artigo 41 a 46, eliminándose o apartado 2 do artigo 42 e o apartado 2 do artigo 44 ata agora vixentes. Inclúese no artigo 42 -no apartado 6- nova documentación requirida ás persoas físicas nas solicitudes de aprazamentos ou fraccionamentos (será necesario que se achegue certificación de saldo de conta corrente e movementos dos últimos tres meses de todas as contas bancarias), e no apartado 7 introdúcese o suposto de denegación das solicitudes de aprazamentos ou fraccionamentos polo incumprimento doutros aprazamentos ou fraccionamentos anteriores por parte dos solicitantes, limitándose a devandita circunstancia á concorrencia de que se producira nos dous últimos anos.

Por último, modifícase o artigo 63, apartados 2 e 3, no relativo ao prazo de exposición pública dos padróns como ao prazo de interposición de recurso de reposición contra as liquidacións contidas no padrón anual, así como o artigo 89.3 referido aos prazos de interposición do recurso de reposición.

A proposta municipal resulta axustada a dereito, polo que se conclúe informar favorablemente o Proxecto de modificación da Ordenanza Fiscal Xeral vixente.

2. No proxecto de modificación da Ordenanza fiscal núm. 200 reguladora do Imposto sobre vehículos de tracción mecánica modifícase o artigo 4.2 para remitir a bonificación para os vehículos cualificados como históricos polo órgano competente da Comunidade Autónoma, ao Real Decreto 892/2024, do 10 de setembro, polo que se aproba o Regulamento de Vehículos Históricos.

Así mesmo, modifícase o paragrafo 4 do artigo 5 aos efectos de facilitar a xestión da exención prevista para os tractores, remolques, semirremolques e maquinaria provistos de Cartilla de Inspección Agrícola, regulando que a solicitude deberá realizarse con anterioridade a que a liquidación ou o recibo de vencemento periódico quedase consentido e firme e concorran na data de devindicación os requisitos necesarios para poder disfrutar da exención. Simplifícase, así mesmo, a tramitación do beneficio fiscal establecendo que nos supostos de autoliquidación deberase formular a solicitude do beneficio fiscal ao presentar a autoliquidación correspondente e aplicándolle, con carácter provisional, a exención.

As modificacións propostas axústanse ao disposto no TRLRFL, así como ás restantes disposicións legais de aplicación, en canto ao sistema de bonificacións e exencións de numerus clausus que nela se establecen, na medida en que son os Concellos quen mediante as ordenanzas fiscais poderán regular a aplicación deses beneficios fiscais no exercicio da súa autonomía financeira.

TRIBUNAL ECONÓMICO-ADMINISTRATIVO

PFA

Refª: Dictame modificación Ordenanzas fiscais 2026

Asunto: Ditame modificacións Ordenanzas fiscais para 2026

A proposta municipal resulta axustada a dereito, polo que se conclúe informar favorablemente o Proxecto de modificación da Ordenanza Fiscal núm. 200 vixente.

3. No proxecto de modificación da **Ordenanza fiscal núm. 203, reguladora do imposto sobre bens inmobles** propóñense as modificacións dos artigos 3.2 e 4.1 en canto á posibilidade da división da cota tributaria, a petición dos interesados, no suposto de concorrencia de varios obrigados tributarios, en concordancia ao previsto no artigo 35.7 da Lei 58/2003, do 17 de decembro, Xeral Tributaria. Aos efectos de dar cumprimento, á recomendación realizada pola Valedora do Pobo, de non restrinxir a posibilidade de división da cota en orde a aspectos económicos, suprímese a restrición de non poder dividirse esta naqueles inmobles nos que como consecuencia da devandita división resulten cotas líquidas de importe inferior a 3,90 €.

As modificacións propostas axústanse ao disposto no TRLRFL, así como ás restantes disposicións legais de aplicación, en canto ao sistema de bonificacións e exencións de numerus clausus que nela se establecen, na medida en que son os Concellos quen mediante as ordenanzas fiscais poderán regular a aplicación deses beneficios fiscais no exercicio da súa autonomía financeira.

A proposta municipal resulta axustada a dereito, polo que se conclúe informar favorablemente o Proxecto de modificación da Ordenanza Fiscal núm. 203 vixente.

III. CONCLUSIÓNS

A posibilidade de modificación das ordenanzas fiscais recóllese no artigo 15 do texto refundido da Lei reguladora das facendas locais aprobado polo Real decreto legislativo 2/2004, do 5 de marzo, e as modificacións do articulado realízanse a partires das instrucións e propostas realizadas polos Tenentes de Alcaldesa Delegados de Área, Concelleiros Delegados e os responsables dos diferentes servizos e do informe da xefa do Servizo de Facenda Local, co conforme da Asesoría Xurídica (artigo 51.1.a do Regulamento Orgánico Municipal do Goberno e Administración do Concello de Lugo).

As modificacións propostas axústanse no seu conxunto ao disposto no citado Real decreto legislativo 2/2004 así como ás restantes disposicións legais de aplicación.

Por todo o anterior, examinados os expedientes remitidos e coas consideracións anteriores, o Pleno do Tribunal Económico-Administrativo do Concello de Lugo acorda **ditaminar favorablemente** o conxunto das modificacións propostas nas ordenanzas fiscais por consideralas adecuadas ao disposto na lexislación vixente.

Para a aprobación da modificación das ordenanzas fiscais requírese, que con posterioridade a este ditame, se realicen os seguintes trámites:

- Informes da Secretaria xeral do Pleno (artigo 3.3.d)^{1º} do Real Decreto 128/2018, de 16 de marzo, do réxime xurídico dos funcionarios de administración local con habilitación de carácter nacional) e do Interventor xeral municipal (artigos 214 e seguintes do Texto Refundido da Lei Reguladora das Facendas Locais e artigos 29 e seguintes do Real Decreto 424/2017, do 28 de abril, polo que se regula o Réxime Xurídico do Control Interno do Sector Público Local).
- Aprobación pola Xunta de Goberno Local dos proxectos de modificación e actualización das Ordenanzas fiscais (artigo 127.1.a) da Lei 7/1985, do 2 de abril, reguladora das bases do réxime local [LRBRL]).
- Aprobación provisional da modificación das Ordenanzas fiscais polo Pleno, requirindo maioría simple (artigo 17.1 do texto refundido da Lei reguladora das facendas locais aprobado polo Real decreto legislativo 2/2004, do 5 de marzo [TRLRFL] e 123.1.d) da LRBRL).
- Publicación do anuncio de exposición pública no Boletín Oficial da Provincia de Lugo así como nun diario dos de maior difusión dentro da provincia de Lugo (artigo 17.2 do TRLRFL).
- Exposición pública durante un mínimo de 30 días hábiles no Taboleiro de anuncios do Concello (artigo 17.1 do TRLRFL).
- Valoración, de ser o caso, das reclamacións presentadas pola Xunta de Goberno Local (artigo 93.1 do Regulamento Orgánico Municipal do Pleno do Concello de Lugo).
- Resolución polo Pleno das reclamacións presentadas e aprobación da redacción definitiva das modificacións propostas das Ordenanzas fiscais (artigo 17.3 do TRLRFL).
- Publicación do texto integro das ordenanzas definitivamente aprobadas ou da súa modificación no Boletín Oficial da Provincia de Lugo (artigo 17.4 do TRLRFL).

De acordo co disposto no artigo 17.3 do TRLRFL no caso que finalizado o período de exposición pública, non se presentaran reclamacións, entenderase definitivamente adoptado o acordo, ata entón provisional sen necesidade dun novo acordo plenario.

TRIBUNAL ECONÓMICO-ADMINISTRATIVO

PFA

Refª: Dictame modificación Ordenanzas fiscais 2026

Asunto: Ditame modificacións Ordenanzas fiscais para 2026

Así mesmo, deberá editarse o texto íntegro das ordenanzas fiscais reguladoras dos seus tributos dentro do primeiro cuadrimestre do exercicio económico correspondente (artigo 17.5 do TRLRFL).

De conformidade co artigo 7 da Lei 19/2013, do 9 de decembro, de transparencia, acceso á información pública e bo goberno, deberá publicarse no Portal de Transparencia do Concello de Lugo o proxecto definitivo das Ordenanzas, os informes e ditames que se tivesen emitido así como os estudos de custos que fundamentan a modificación no seu caso.

Asinado dixitalmente polo vogal do Tribunal Económico-Administrativo, Pedro Fernández Agustí, e pola membro suplente, María Jesús López Vázquez, na data que se indica á marxe.